



17. januar 2011

UPA 2011/40

Inatsisartut Suleriaasianni § 33 naapertorlugu aalajangiiffigisassatut siunnersuut imaatoq matumuuna saqqummiuppara:

**Illuni kikkunnit tamanit iserfigineqarsinnaasuni imaluunniit amerlasuunik suli-soqarfiutigisuni pisortat sanaartortitsinerini iluarsaassinikkullu suliaqarnerini (pisortat sanaartortitaat) sanaartornissamut aningaasaliissutit tamakkerlutik 1 %-iinik sanaartukkap silataatigut iluatigullu kusassarneqarnissaannut atugas-sanik Naalakkersuisut immikkoortitsisaqqullugit peqquneqarnissaannik Inatsisartut aalajangiinissaannik siunnersuut. Aningaasat taakku ingerlatassamut immikkut normulerneqartassapput ukiumoortumillu Aningaasanut inatsisissatut siunnersuummi takuneqarsinnaassallutik.**

(Inatsisartuni ilaasortaq Jane Petersen, Inuit Ataqatigiit)

### **Tunggavilersuut**

Pisortat suliffiutaanni suliffeqarfiinilu amerlaqisuni angalaaraanni avatangiisit ilisarnaa-teqanngissusii – kinaassuseqanngissusii – tupinnartarput. Uffa meerarpassuit inersima-sullu ullut tamaasa nalunaaquttap akunnerparujussuini aamma tamakkunaniittaraluartut.

Avatangiisit nuannaalersitseqataasussaapput, ataatsimoortuunermik susassareqatigiin-nermillu pilersitseqataasussaallutik aammalu tassaassallutik ulluinnarni inuunitta ilagi-saat, angerlarsimaffitsitut, suliffitsitut, aamma meeqqatsinnut ilinniarfittut paaqqinnittar-fittullu, napparsimasortatta utoqqartattalu isumagineqarfiisut, paaqqutarineqarfiisullu. Taamaammat pisortat illorsuaataat uummarsartariaqarput, qalipaasersorneqarlutik pigi-neqartutullu isigineqalersinneqarlutik, piukkunnarnerpaassaarlu eqqumiitsuliornikkut ku-sassaasarnissaq pingaartumik allaffeqarfinnut, isumaginnittoqarfinnut, peqqinnissaqar-finnut kiisalu kultureqarnermik ilinniartitaanermillu suliaqarfinnut tunggatinneqarne-ruppata.

Aningaasarpassuit sanaartugassanut iluarsartugassanullu atugassanngorlugit ukiut tama-sa aningaasanut inatsimmi immikkoortinneqartartut maannamiit sanaartugassat tamaasa ataasiakkaarlugit iluisigut silataasigullu kusassarnissaannut atugassanik ilaqartinneqarta-riaqalerput.

Eqqumiitsuliornikkut periaatsit atorlugit illorsuarnik kusassaasarneq takussutissaqareer-poq: Narsami Inuili, Qaqortumi GU, Aasianni Mittarfiup illorsuartaa, taakku assersuu-tigiinnavillugit. Maannamulliuna illorsuit sorliit kusassagaassanersut nalaatsornerinnaa-sartog. Maannamiit tamanna nalaatsornerinnakkut aalajangerneqartarunnaartariaqarpoq.

Taamaattumik sanaartugassani kikkunnit tamanit iserfigineqarsinnaasuni iluarsartuussa-nilu annerni aningaasanik kusasaanermut atugassanik immikkoortitsisoqartalissasoq, aningaasallu tamakkua ukiumoortumik Aningaasanut inatsisissatut siunnersuummi taku-neqarsinnaalernissaat qulakkeerneaqqullugu Naalakkersuisut peqquneqarnissaat siun-nersuuteqarfigaara.

### **Aningaasartuuteqarnikkut allaffissornikullu Pisortanut kingunerisassai.**

Siunnersuummi anguniarneqarpoq illuni kikkunnit tamanit iserfigineqarsinnaasuni ima-luunniit amerlasuunik sulisoqarfiutigisuni eqqumiitsuliornikkut kusassaasarnissaq, taa-maattumillu matumani allaffeqarfinnut, isumaginnittoqarfinnut, peqqinnissaqarfinnu kii-

salu kultureqarnermik ilinniartitaanermillu suliaqarfinni sanaartugassanut kusassaa-sarnissaq pingaarnertut sammitinneqartussaavoq. Namminersorlutik Oqartussat kommunillu sanaartornerannut, matuma nassatarisaanik kusassarneqartartussanngorsinnaasunut 2006-imi ukiumut aningaasartuutaasimasut 350 mio. koruunit missaaniissimapput. Siunnersuut taamanikkut atuuttuuppat kusassaanermut 2006-imi 3,5 millioner koruunit tikillugit immikkoortitsisoqartussaasagaluarpoq. Namminersorlutik Oqartussat kommunillu ukiumiit ukiumut sanaartugassanut immikkoortittagaat allanngorartarmata taamaammat kusassaanermut atortagassat soorunami aamma allanngorartuussapput.

Siunnersuut Namminersorlutik Oqartussat kommunillu annikitsuinnarmik allaffissornerulernerannik sunniuteqassanganneqarpoq, tassami pisortat sanaartortitsisutut suliasaanni kusassaa-sarnissaq piumasaqaatinngortinneqaraluarpat aamma ilaariissammat.

Siunnersuut timaliivigineqarpat pisortat illuutaanni aserorterinerit sequtserinerillu annikilleriarnerannut aamma sunniuteqassaaq, taamaalillunilu inuiaqatigiinnut ileqqaarutaa-lissalluni.

**Aningaasartuuteqarnikkut allaffissor-nikkullu namminersorlutik inuutissarsiuteqartunut kingunerisassai.**

Siunnersuut namminersorlutik inuutissarsiuteqartunut aningaasartuuteqarnikkut allaffissor-nikkullu sunniuteqartussaangilaq.

**Aningaasarsior-nikkut allaffissor-nikkullu innuttaasunut kingunerisassai.**

Siunnersuut innuttaasunut aningaasartuuteqarnikkut allaffissor-nikkullu kinguneqartussaangilaq. Paarlattuanilli naatsorsuutigisariaqarpoq siunnersuut innuttaasut tarnikkut timikkullu ilorrisimaarnerulernissaannut pitsaasumik sunniuteqassasoq, taamaalillunilu pisortat illuutaanni aserorterisarnerit sequtserisarnerillu annikilleriarnerannut pissutaagataassalluni. Siunnersuutip piviusunngortinneqarnerata aamma kingunerissavaa kalaallit eqqumiitsuliortut sanaluttartullu annermik atorfissaqartinneqalernerat, taamaalillunilu pisortat akileraarutitigut isertittagaat annertuseriarnerannik aamma kinguneqassalluni.